

Kalaallit eqqumiitsuliaannut nunatta eqqumiitsulianik saqqummersitsiveqalernissaa pillugu Naalakkersuisut peqquneqarnissaannik Inatsisartuni aalajangiiffigisassatut siunnersuut.

(Inatsisartunut ilaasortaq Muté B. Egede, Inuit Ataqatigiit)

Akissuteqaat

(Ilinniartitaanermut, Kultureqarnermut, Ilisimatusarnermut Ilageeqarnermullu Naalakkersuisoq)

Siullermeerinnineq

Kalaallit eqqumiitsuliaannut nunatta eqqumiitsulianik saqqummersitsiveqalernissaa pillugu Naalakkersuisut peqquneqarnissaannik aalajangiiffigisassatut siunnersuummut Naalakkersuisut qujapput.

Aalajangiiffigisassatut siunnersuummi allaqqavoq: ”eqqumiitsuliorneq kulturitsinnut qalipaasersuisuuvoq, kinaassutsitsinnik piginnaasatsinnillu uppersaasersuisuulluni taamattaarlu oqaluttuaatitsinnik takutitsuulluni. Tamanna uatsinnut pisuunnguutaavoq – allanulli nunatsinnut tikeraartunut aamma nuannaarutissiisuulluni”. Naalakkersuisut aamma taamatut isumaqarput.

”Eqqumiitsulianik Nunatta Katersugaasivia” Inatsisartuni, Naalakkersuisuni tusagassiorfinnilu arlaleriarluni sammineqartarnikuuvoq. Naalakkersuisut ungasinngitsukkut nalunaarutigaat suliniutini angisuuni taamaattuni periusaasarnikuusoq aningaasaateqarfinnik suliniummik aningaasalersuinissamut soqutiginnittunik suliniuteqartoq nassaaraangat ingerlatsinerneq tapiissuteqarnissamut Naalakkersuisut aatsaat neriorsuisartut. Naalakkersuisulli paasisinnaavaat suliniut siusinnerusukkut suliniutaasarsimasunit allaanerussuteqartoq, tassa suliniut naammasseriigaq pigineqarmat, tasanilu taamaallaat pilersitsinissamut tamassumalu kingorna ingerlatsinissamut aningaasat amigaataaginnarlutik. Taamaammatt Eqqumiitsulianik Nunatta Katersugaasivia aningaasaateqarfiup aningaasaliineratigut pilersinneqarsinnaappat ingerlatsinerneq tapiissuteqarnissamut neriorsuillutik Naalakkersuisut aningaasaateqarfimmuut nalunaaruteqareernikuupput.

Aningaasaateqarfiup siulersuisui aamma nalunaaruteqarput sanatitsisuunissaq kissaatiginagu, aammalu Naamminersorlutik Oqartussat sanatitsisuunissaat eqqarsaatigineqartoq.

Sanaartornerni allani misilittakkat takutinnikuuaat, sanatitsisuuneq aningaasatigut kinguneqarsinnaasunik ajutoorfissaqarsinnaasoq, aammalu aningaasanut inatsisissatut siunnersuummi avammut saqqummiuteqqammerneqartumi allaqqavoq Nunatta Karsia ukiuni makkunani aningaasanik saniatigut atugassaqarpiangitsoq. Taamaammatt aningaasalersuinissaq inissinneqarpat suliniut sanatitsisuunerlu Naalakkersuisut tigusinnaassavaat. Taamatut isumaqatigiissuteqarnermi immikkut piumasaqaat

ilanngunneqassaaq, tassani missingersuutigineqartut sanaartornermi 200 mio. kr.-t qaangerneqassappata sanaartornermi Naalakkersuisut aaqqiisinnaatitaassallutik.

Taamaammatt qulaani taaneqartunut tapiliullugu AIS 2017-ip aappassaaneerreqarnerannut kontomut pingaarnermut 40.94.12-imut Nunatta Katersugaasivia Allagaateqarfialu, oqaaseqaatinut allannguutissatut siunnersuummik Naalakkersuisut saqqummiiniarput, tassani Nunatta Eqqumiitsulianik Katersugaasivianik tamakkiisumik aningaasalersorneqartumik sanaartornermik tigusinissamik neriorsuuteqartoqassalluni.

Kisiannili sanaartornissamut Namminersorlutik Oqartussat aningaasanik toqqaannartumik immikkoortitsinissaat Naalakkersuisut tapersersinnaangilaat, tassa Naalakkersuisut naliliimmata sanaartornerit allat pingaarnerusullut salliuinneqartariaqartut. Siunnersuummi tunngavilersuutigineqartut Naalakkersuisut imatut paasivaat, sanaatornermi aningaasartuutitut aningaasaleeqataanissamut pisussaaffeqarnermik taasissutigineqartussaq imaqartoq.

Qulaani allassimasutut Naalakkersuisut paasinnillutik, siunnersuutip taamatut iluseqartillugu itigartitsissutigineqarnissaa Naalakkersuisut inassuteqaatigaat.